

Thursday, June 25, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

INTERNATIONAL DAY AGAINST DRUG ABUSE & ILLICIT TRAFFICKING

Chief Minister Pu Lalduhoma chuan ruihhlo zuar ru hria chu report zel tur leh an phu tawk hremna hmu ngei zel se a duh thu a sawi.

Vawiina Social Welfare, Women & Child Development department buatsaih International Day against Drug Abuse & Illicit Trafficking puala Dawrpui Multipurpose Hall, Aizawla hun hman a telpuinaah he thu hi Chief Minister chuan a sawi a. Chief Minister chuan Sorkar, tlawmngaipawl leh kohhran hoten theihtawp an han chhuah tih sawiin supply lam ringawt danchah tum lovin, demand lam tihtawp pawh an tum tih a sawi a. Security Coordination Committee din a nih thu leh Ruihhlo Do Core Committee an tihnun thar leh thu a sawi a. YMA ten kumpuanah Ruihhlo Do puangin Anti-Drugs Squad an kalpui thu leh chhun-zan zawmin hma an lak thu a sawi a. Kohhran hrang hrangte thawhpuiah an sawm tih sawiin zirlai naupangte zingah awareness an kalpui thu leh media campaign a kal reng thu sawi a. Ruihhlo laka ram venhim, ruihhlo bawiha tang lo tura thangtharte hnena zirtirte chu hna pawimawh ber a nih thu a sawi a ni.

International Day against Drug Abuse & Illicit Trafficking pual hian district hrang hrangah pawh hun hman a ni.



NASHA MukT BHARAT ABHIYAAN

Nasha MukT Bharat Abhiyaan (NMBA) pualin Hnahthialah zirlai naupangten ruihhlo leh ruihhlo tawlhruk dona kawngzawh- Grand Rally an huaihawt.

Vawiin khan Hnahthial zirlai naupangte leh zirtirtute chuan Ruihhlo leh Ruihhlo Tawlhruk Dona Kawngzawh – Grand Rally chu Hnahthial khawchhung hmun hnih – Nauhruaikawn leh Electric Veng Volleyball Court atanga tanin Bazar Shed kawtah intawh khawmin programme hman nghal a ni a. He hun hmanpuitu Hnahthial District NMBA Committee Chairman leh Bawrhsap ni bawh, Pi K.Vanlalruati chuan Nasha MukT Bharat Abhiyaan in a bitum ber chu thalaite, hmeichhiate, naupangte, zirna in hrang hrang a zirlaite, tlawmngai pawlte leh khawtlang mipuite an nih thu a sawi a. Khawtlanga ruihhlo do tura mipuite nena tangruala ruihhlo an do ta chu lawmawm a tih thu a sawi a, zirlaite hnenah damdawi hmansual pawh zia sawiin ti ve chhin ngailo turin a chah bawh ani.

NMBA Master Trainer Pu H. Hmingthanzuala chuan zirlaite tan ruihhlo that lohna leh tichhin pawizia zirtirna hun a hmang a, hemi zawh hian Ruihhlo laka fihlim tura intiamna - NMBA Pledge chu lak niin pledge lakna hi programme chairman, Pu Joseph Zokunga chuan a kaihruai a ni.



SAMVIDHAN HATYA DIWAS

BJP Mizoram President Dr. K. Beichhua chuan vawiin India ram danpui palzut ni champha, Samvidhan Hatya Diwas chu democracy ram ropui India ram history-ah chuan hun tha lo tak, hun duhawm lo hriatrengna a nih thu a sawi.

Vawiin India ram danpui palzut ni champha, Samvidhan Hatya Diwas puala BJP pisa, Mipui Run, Aizawla hun an hmannaah Akashvani News zawhna chhangin he thu hi sawiin BJP President chuan a sawi a. India ram danpui palzutna chu India ramah thleng tawh lo se tih chu a duhdan a nih thu a sawi a. An party chuan an lak thutak thu sawiin kumtin he ni hi 'black day' anga hmangin urhsun taka an hman thin thu a sawi a. Dr. K. Beichhua chuan India ram chu democracy ram ropui tak, hnam hrang hrang leh chi hrang hrang culture leh tradition te pawh hrang hrang awmna a nih thu sawiin fimkhur taka political party zawng zawngte pawhin ram an kaihhruaia a tul thu a sawi.

Byte of Dr. K. Beichhua

June ni 25, 1975-a Pi Indira Gandhi rorelna hnuaiah National Emergency puan hian khua leh tui te dikna chanvo Fundamental Rights tihtawp a ni a, he ni hi India danpui tihhlumna ni -Constitution Murder Day tih hiala sawi thin a ni a. Vawiina Samvidhan Hatya Diwas puala hun hmana thusawitu Dr. Zonuntluanga chuan tuna Prime Minister Pu Narendra Modi chu a hunlaia tangkai tak , India danpui palzut duhloa bei tu a nih thu a sawi.



MPCC Sr. VP

MPCC Sr.Vice President Pu Lalnunmawia Chuaungo chuan tun sorkarin India rama tun sorkarin kum 12 chhung rorelna an chan chhung in mipui tana pawt tak thil thleng eng emaw zat a thleng tih sawiin zirlaite leh thalai hna zawng mekte tibeidawng em emtu chu exam chi hrang hrang zawhna putru anih thu a sawi.

Vawiin khan Aizawl Press Club-ah chanchinbumite kawmin kumin May 3 a National Eligibility Cum Entrance Test (NEET) kha zirlai nuai 22 chuanguin an Exam tih sawiin, India rama Medical Seat nuai 1 sing 2 sang 9 awmah Doctor zir ve ngei tumin theihtawp an chhuah tih a sawi a. Mahse, zawhna putru avangin June 21 khan Exam that tir leh an ni tih sawiin, NEET Paper putru avang hian zirlai 12 an intihhlum phah tih a sawi a. NEET Paper hi Exam hmain WhatsApp-ah Rs.5000 Rs.30,000 te in lei tur a awm a tih sawiin Rajasthan-ah phei chuan nuai 30 thlenga hralh a nih thu a sawi a. Tun sorkar kum 12 chhung hian ram pum huap Exam (National Level Exam) ah tum 23 zet zawhna put ru a awm tawh tih a sawi a.

MPCC Sr. Vice President chuan sorkar in National Education Policy, 2020 a kalpui dan pawh hi tih tak takna a awm lo niin a sawi a, Congress kaihhruai, UPA sorkar khan Education-ah Budget pumpui atanga 100-a 4.7 sum a dah lain, tunah chuan 100-a 2.4 chauh a dah tih a sawi a, Thil man sang zel leh pawisa hlutna tlakhniam dan aṭang chuan India ram zirna kalpui tak tak tur chuan Budget pumpui atanga zaa 2.4 chu a beitham mah mah tih a sawi a ni.

